

# Ho Rata Jehova Molimo oa Hao



## SABATHA MANTSIBOEA

**Bakeng Sa Thuto ea Beke ena Bala:** *Deut. 6:4, 5; Deut. 10:12; Baef. 2:1–10; Tsen. 14:6, 7; Deut. 4:37; Deut. 11:1; Mar 12:28–30.*

**Temana ea Khopolo:** “‘Rata Jehova, Molimo oa hao, ka pelo ea hao oohle, le ka moea oa hao oohle, le ka matla a hao ’oohle’” (*Deuteronomo 6:5*).

**T**umelong ea Sejude, e ’ngoe lithapelo tsa bohlokoa-hlokoa e nkuoa ho Deuteronomo 6. E tsejoa e le “Shema,” e rehiloe joaloka ka baka la lentsoe le qalang la Seheberu le qalang thapelo, ho tsoa kutung *shama*<sup>4</sup>, eleng se bolelang “ho mamela,” kapa “ho hlonepa” lentsoe le lutseng le hlahella khafekhafetsa, eseng feela ho Deuteronomo empa le Testamenteng ea Khale.

Mola oa pele oa Shema o baleha tjena:

*Shema Yisrael Adonai Elohenu Adonai echad.*

Ho bolela ’ng: “Utloa Iseraele, Molimo oa rona, ke Jehova, A ’notsi!” (*Deut. 6:4*). Hangata ha Bajude ba rapela thapelo ena ba koala mahlo, sepheo ke ho thibela eng kapa eng ho se ba phatsamise ha ba nahana ka Molimo. Mola ona oa pele oa Shema o nkuoa e le tiiso ea tlhaho ea bo’ngoe ba Molimo *Adonai Elohenu*, “Jehova Molimo oa rona,” le botšepahi ba Iseraele fela eseng “molingoa” o mong. Ha e le hantle, e ka boela ea baloa e le “Jehova ke Molimo oa rona.”

Mola ona ke karolo ea puo ea pele eo Moshe a ileng a e fa bana ba Iseraele nakong eo ba le mathuleng a ho kena Lefatšeng la Pallo. Se latelang mola ona o bulang, ke phatlalatsa e matla ea ’nete e salang e le bohlokoa-hlokoa kajeno, joalokaha ho bile joalo nakong eo.

*\*Ithute Thuto ea Beke ena Ho Lokisetsa Sabatha la, 23 Mphalane.*

## Ho Rata Molimo

Kamora hore a phetele bana ba Iseraele nalane ea bona, o ile a qalella ho phetela bana ba Iseraele nalane ea bona, o ile a qalella ho ba fa litaelo malebana le tseo ba neng ba tlameha ho li etsa hore ba nke naha le ho ata ho eona. E, motho a ka etsa khang ea hore boholo ba Deuteronomo e n’e mpa feela e le: Jehova ea bolellang batho seo ba tlamehang ho se etsa ele ho etsa boikarabello ba bona selekaneng, eleng seo a se entseng ka mohau ho phethahatsa litšepiso tsa hae ho bo ntata bona.

Deuteronomo 6 e qala tjena: “Ke eona melao, le litaelo, le likahlolo, tseo Jehova, Molimo oa lona a ntaetseng ho le ruta tsona, hore le tle le etse ka tsona lefatseng leo le eang ho le ruoa, u tle u tsabe Jehova, Molimo oa hau, ka ho boloka melao ea hae eohle, le litaelo tsa hae tsohle, tseo ke u laelang tsona hore u li boloke, e le uena, le mora oa hao, le mora oa mora oa hao, ka litsiu tsohle tsa ho phela ha hao, matsatsi a hao a tle a ngatafale” (*Deut. 6:1, 2*).

**Bala** Deuteronomo 6:4, 5. Ke taelo efe eo Jehova Molimo a e fang bana ba Iseraele temaneng ea 5? Seo se bolelang?

---

*Rata Jehova Molimo oa hao ka pelo ea hao eohle...?* Ho thahasellisa hakakang hore mona, hara litemoso tsena kaofela, melao, le liphelelo, hothoe batho ba rate Molimo. Ebile, eseng ho mo rata fela, empa ho etsa joalo “ka pelo ea hau eohle, ka moea oa hau oohle, le ka matla a hao ohle” se supang tlhahong ea sehlohlolo sa lerato lena.

Ho rata Molimo ka pelo le moea le matla ’ohle a hao ho bolela hore lerato la rona ho eena le tlameha ho tla pele ho mang kapa mang le eng kapa eng eo re ka e ratang, hobane ke eena motheo oa sohle seo re leng sona le ho phela kapa eng le eng. Lerato la rona ho eena le tlameha ho kenya lerato la rona la sohle mocheng o nepahetseng.

Seheberung, lentsoe, “hao” bakeng sa Molimo oa hao, pelo ea hao, matla a hao, le bonngoeng. E, Molimo o ne a buoa le batho bohle, empa ntho e feletseng e etsoa matla ke likarolo tsa eona. Jehova o batla hore e mong le e mong oa rona, leha e le karolo ea ’mele o moholo, hore re mo tšepahalle ka bo mong, ’me motheo oa botšepahi boo e lokela ho ba lerato la rona ho eena, bakeng sa seo a leng sona, le seo a re etselitseng sona.

**Ho bolel’ang ho uena ho rata Molimo ka pelo, moea le matla ohle a hao?**

## Ho Tšaba Molimo

Moshe o ile a bolella bana ba Iseraele hore ba rate Molimo ka sohle seo ba nang le sona. E n'le taelo. Leha ho le joalo, litemaneng tse seng kae pele ho moo Moshe o ile a ba fa taelo e 'ngoe: “U tle u tšabe Jehova Molimo oa hao” (*Deut. 6:2*).

**Bala** Deuteronoma 10:12. Temana tsee li reng ka lerato le tšabo, 'me re li utloisisa joang?

---

Temaneng e 'ngoe ba joetsoa hore ba tšabe Molimo, ho e 'ngoe, hore ba mo rate, temaneng ena hothoe ba mo tšabe ba be ba mo rate ka nako e le 'ngoe. Kutloisisong e tloaelehileng ea lentsoe lena “tšabo” hona ho ka bonahala e ka ke ntho'e loants'anang, empa haho joalo. Empa, ho tšaba Molimo—ka mokhoa oa ho mo hlonepha joaloka motlotlehi, ho hlonepha matla, toka, le ho loka ha hae, haholo-holo ha re sheba kamoo re leng baetsalibe kateng, re fokolang, re itšetlehileng ho eena ka hohle—e tlameha hoba ntho'e itlelang feela ho rona. Re libopua tse oeleng, tse tlotseng molao oa Molimo hape tseo ka mohau oa hae, li tlamehang ho fua thohako le lefu la ka ho sa feleng.

**Bala** Baefese 2:1–10. Ke joang litemana tsee li re thusang ho utloisisa kamoo re lokelang ho tšaba le ho rata Molimo ka nako e le 'ngoe kateng?

---

Ntle le taba ea hore re ne re le “bana ba khalefo” (ke ka hona re lokelang ho mo tšaba), Krete o re shoetse 'me a re fa bophelo bo bocha, bo kenyetsang tokoloho sebeng le thohakong ea nako e fetileng (ke ka hona re lokelang ho mo rata).

'Me joalokaha sena e le 'nete ho rona kajeno, eona tšiea ena e ne e sebetsa le ho Iseraele: e bile makhoba Egepeta, ba le tlasa thohako ea bokhoba le khatello, 'me ebile lerato la Molimo ho bona le mohau oa hae ho bona tse ileng tsa tlisa topollo ea bona e kholo. “U hopole hobane u bile mofu fatšeng la Egepeta, le hobane, Jehova Molimo oa hao, o u ntšitse teng ka letsoho le matla” (*Deut. 5:15*). Ha ho makatse, hore e be ba rata Molimo ba bile b'a motšaba ka nako e le 'ngoe. 'Me ebang ba ne ba lokela ho etsa seo, joale rona, ba nang le 'nete e kholo ea Jesu ea re shoetseng sefapanong, re tlameha ho mo rata le ho mo tšaba hakakang?

**Bala Tšenolo 14:6, 7. Re lokela ho utloisisa hore na hobaneng taelo ea “ho tšaba Molimo” e tlamehang ho ba eona ea pele molaetseng oa Morena oa mehla ea bofelo? Ha u sheba taba ea hore rea tseba hore na ke sefe se tlang lefatšeng, ke hobaneng ha taelo ee e utloahala haholo?**

## O re Ratile Pele

Le hara melao le litaelo tse ho Deuteronoma le likhalemelo tsohle tse lemosang sechaba sa Bajude hore se boloke “litaelo tsa hae, likahlolo tsa hae, le melao ea hae,” ba ne ba tlameha ho qala ka ho rata Molimo ka pelo tsohle, moea le matla a bona. E, ba ne ba e na le mabaka a matle a ho etsa joalo.

**Bala** Deut 4:37; Deut 7:7, 8, 13; Deut 10:15; Deut 23:5; le Deut 33:3. **Litemana tsee li re rutang ka lerato la Molimo bathong ba hae?**

---



---

Khafe-khafetsa ho Deuteronoma, Moshe o boletse batho ka lerato la Molimo ho bona le bo ntat'a bona. Empa eseng ka mantsoe feela, Morena o ile a bonahatsa lerato la hae le ka liketso. Ke hore, ho sa natsoe mefokolo ea bona, ho feila ha bona, libe tsa bona, lerato la Molimo ho bona ha lea ka la sisinyeha—lerato le ileng la bontšoa ka matla nthong tseo a neng a sebetsa le bona ka tsona.

**“Rea mo rata hobane a re ratile pele”** (1 Johanne 4:19).

**Temana ee e re thusa joang ho utloisisa kamoo re tlamehang ho rata Molimo kateng?**

---



---

Lerato la Molimo ho rona le bileng teng le pele a re bopa, ka hore leano la topollo le bile teng “pele lefatše le thehoa” (*Baef. 1:4*).

Joalokaha Ellen G. White a boletse: “Leano la topollo ea rona ha e ea ka ea e ba ntho’e nahanoang kamora ho oa ha Adama. E ne e le tšenolo ea ‘sephiri se neng se entsoe lekunutu ho tloha mengoaheng e sa baleheng.’ Baro. 16:25. E bile maemo a neng a phutholla metheo ea terone ea Molimo ho tloha mengoaheng e se nang palo.”—*Eo Bohle Esale ba Monyoreloa* leq. 22.

Re lehlohonolo ha kaakang hore e be Molimo, ke Molimo ea lerato, lerato le lehlole hona hoo ga ileng sefapanong bakeng sa rona, lerato la ho iketsa sehlabelo le entseng hore a “ikokobetse, a iketsa ea utloang ho isa lefung, e, le lefung la sefapano” (*Bafil. 2:8*). Ka hona, le rona kajeno re na le tšenolo ea lerato la Molimo eo bana ba Iseraele ba neng ba keke ba e nahana.

**Ho e na le ho ba lerato, hoja e be Molimo e n’e le lehloeo kapa e be Molimo o ne a sa khathalle moo? Lefatše lee le ne le tla ba joang? Hobaneng ha tšenolo ea lerato la Molimo ho rona e le ntho’eo le rona re tlamehang ho e thabela?**

## Haeba u oa Nthata, Boloka Melao Eaka

Sechaba sohle sa Iseraele—ne se bilelitsoe ho rata Molimo. Empa sena le sona ne se ka etsoa ke motho ka mong. Kaha motho ka mong o fuoe matla a boikhetlo, Moiseraele ka mong o ne a tlameha ho etsa khetho ea ho rata Molimo—'me ba ne ba tlameha ho bontša lerato leo ka ho mo mamela.

**Ke sefe se tšoanang seo litemana tse latelang li nang le sona? Ke hore, 'moko-tabo o tsoanang oo li nang le oona ke ofe?**

*Deut. 5:10* \_\_\_\_\_

*Deut. 7:9* \_\_\_\_\_

*Deut. 10:12* \_\_\_\_\_

*Deut. 11:1* \_\_\_\_\_

*Deut. 19:9* \_\_\_\_\_

Na Lentsoe la Molimo le ka hlaka ho feta moo? Hantle joalokaha Molimo o sa buoa feela ha A re o oa re rata, empa a bontšitse lerato leo ka seo a se entseng le seo a ntseng a se etsa, batho ba Molimo, le bona ba tlameha ho bontša le rao leo ka liketso. 'Me litemaneng tsena re bona hore ho rata Molimo ha ho arohane le ho mo mamela.

Ke ka hona, ereng ha Johanne a buoang ntho tse kareng, “Hobane ho rata Molimo ke ha re boloka litaelo tsa oona” (*1 Johanne 5:3*), kapa ha Jesu a re, “Haeba lea nthata, bolokang melao ea ka” (*Johanne 14:15*), litemana tsena li mpa li hlalosa thuto ena ea mantlha. Lerato la Molimo le tlameha ho lula le bontšoa ka ho mamela Molimo. Sena e sale se le joalo, 'me se tla lula se le joalo. 'Me ho mamela Molimo hona ho bolela ho boloka melao ea hae, Melao e Leshome, e kenyeletsang le molao oa bone oa Sabatha. Ho boloka molao oa bone ha se ho lumela ho bolokoa ke molao, hantle joalokaha ho boloka melao e robong ho se joalo.

Leha ho boloka molao ofe kapa ofe e kaba ho lumela ho bolokoa ke molao, mofuta oono oa ho mamela ha o etsoe ka lerato ho Molimo. Ha e ba re fela re rata Molimo e le ka nnete, haholo-holo ka baka la seo a re etselitseng sona ka Jesu Krete, re batla ho mo mamela, hobane ke sona seo a reng re se etse.

Ha Moshe a ne a lutse a bolella Baiserale hore ba rate Molimo a mo mamele, o entseng joalo, hakere ba ne ba lopollotsoe Egepete? Ke hore, lerato le ho mamela ha bona e ne lekarabelo ea topollo ea bona. Ba ne ba lopollotsoe ke Morena. Joale ba ne ba lokela ho araba ka ho mo tšepahalla ka ho boloka melao ea hae. Na ha ho joalo le kajeno?

**Maiphihlelo a hao ke afe a ho leka ho mamela Molimo? Ke hore, sepheo sa hao ke sefe ha o leka ho mamela Molimo? Ke hobaneng e lokela ho etsoa ka lerato? Ke karolo efe, eo ho tšaba ho boleloang ke Bibe, ho e bapalang?**

## Molao oa Pele

Leha Bakreste ba bang ka mabaka a tsejoang ke bona, ba leka ho arola Testamente e Ncha ho ea Khale, sena ha se khonehe, ntle le ho sotha se boleloang ke Testamente e Ncha. Testamente e Ncha kamoo e senolang Jesu kateng le lithuto-molimo tsa eona tse hlalosang bophelo ba hae, lefu, tsoho, le boprsta ba hae bo boholo, ho supa phethahalo ea boporofeta bo bongata Testamenteng ea Khale. Ka tsela tse ngata, Testamente ea Khale e fana ka foromo, motheo, le maemo bakeng sa Testamente e Ncha. Testamente tsena ka bobeli li bontša botle le lerato la Molimo.

Lena ke le leng la mabaka ao ka lona, khafe-khafetsa, Testamente e Ncha, le eena Jesu, a qotsitseng Testamente ea Khale.

**Bala** Mar 12:28–30. Potso ea pele e botsitsoeng ka molao “oa pele o moholo” ke efe? Jesu o arabela joang, 'me karabo eo ea hae o e nkile kae?

---

Ho a thasellisa hore e be mongoli, motho ea iteletseng ho phelela ho utloisisa molao le kamoo o tlamehang ho lateloa kateng, o na tlameha hore e be o kile a botsa potso ena. Empa, melao e mengata eo ba neng ba lumela hore ba tlameha ho e boloka (neano-taba ea sejude e re hone ho e-na le melao e ka bang 613), haho makatse hore e be ba batla hore o akaretsoe ka polelo e le 'ngoe feela.

Joale Jesu o etsa joang?

O ea ka kotloloho ho Deuteronomoma 6, o qala ka “Utloa, Iseraele, Molimo oa rona ke Jehova, Jehova a 'notsi!” (Deut. 6:4), e be o qotsa le temana e latelang, e mabapi le ho rata Jehova ka pelo ea hao eohle, moea, le matla. O ile a supa ntlha-kholong ea kamoo Jehova eleng Molimo oa bona kateng, Eena a le mong, a ipapisitse le 'nete ena e kholo, ba biletsoa ho mo rata ho feta ka ho fetisisa.

Ke sefe seo e ka bang “nete ea kajeno” ho feta molao oo? Matsatsing a bo felo hantle, nakong eo liketsahalo tsa bofelo li tla etsahala 'me e mong le e mong a biletsoa ho nka lehlakore, melao ea Molimo e tla bapala karolo ea bohloko-hlokoa (Tsen. 14:12).

Qetellong, lehlakore leo re le khethang, le hara litlhoriso, le tla itšetleha holima hore na re fela re rata Molimo kapa che. Qetellong, lehlakore leo re le khethang, le hara litlhoriso, taba e tlabana hore na re fela re rata Molimo kapa che. Sena ke sona se fang motho lehlakore leo a le nkang, 'me re ka rata Molimo ka pelo, moea le matla a rona kaofela ha feela re mo tseba ka kotloloho re bile re ba le maiphihlelo a molemo, lerato, le mohau oa hae. Haeba ho hlokeha, ke sona seo re tlamehang ho se shoela.

**Haeba motho a ka u botsa: motho a ka rata Molimo eo a e-so ka a 'mona joang, u ka reng? Buisanang ka likarabo tsa lona ka sehlopheng.**

**Ho Ithuta ka Botebo:** “Sefapano sa Krete e tla lula e le saense le pina ea balopolloa ka ho sa feleng. Ba tla bona Jesu ea thakhisitsoeng khanyeng ea hae. Ha ho mohla ho tla lebaloa hore eo matla a hae a hlolileng le ho tsoara mafatše a sa baleheng a chalametsang moholokohlong oa sepaka-paka, ea ratoang ke Molimo, Khosi ea leholimo, eena eo Likerebumi le lirafine tse khanyang li ratang ho mo khumamela—a ikokobelitseng ho pholosa batho ba oeleng; hore a jare molato le mahlabisa-lihlong a sebe, le ho ipata ha sefahleho sa Ntat’ae, ho fihlela masisa-pelo a fatse le lahlehileng a roba pelo ea hae sefapanong sa Golgotha. Hore e be moetsi oa mafatše ohle, moahloli oa pheletso tsohle, a ka behella khanya ea hae ka thoko ebe o khetha ho itlontolla ka baka la lerato la hae ho motho ho tla lula ho thabisa tlhohle eohle. Ha lichaba tsa balopolloa li talima Mopholosi oa tsona ’me li bona khanya ea Ntate sefahlehong sa hae; nakong eo ba shebang terone ea hae, e senang qaleho le pheletso, ’me ba tseba hore ’muso oa hae ke oa ka ho sa feleng, b’ a phaloso ka pina: ‘Ho loketse, ho loketse Konyana e hlabiloeng, e re pholoselitseng ho Molimo ka mali a hae a bohlokoa!’ ”—Ellen G. White, *The Great Controversy*, maq. 651, 652.

### Lipotso tsa ho Qoqoa:

- ① Bala polelo ea Ellen G. White e kaholimo. Ke sefe seo e se buoang se ka re thusang ho utloisisa hore na hobaneng ha lerato la rona ho Molimo e tlameha ho ba lerato le lehlohali ho feta ohle ao re ka bang le oona? Nahana ka se ka boleloang ka hore Molimo, eena ea tšoereng “ea tšoereng mafatše a sa baleheng moholokohlong oa sepakapaka” ke eena ea ileng sefapanong bakeng sa rona. Ke hobaneng ha ’nete ee e tlameha ho ba motheo oa likamano tsa rona le Molimo?
- ② Tsepamisa maikutlo tabeng ea ho rata le ho tšaba Molimo ka nako e le ’ngoe. Re etsa joalo joang, ’me hobaneng re tlameha ho li etsa li le peli?
- ③ Ho monate ho rata Molimo ha ntho li tsamaea bothebebele maphelong a rona. Empa ha ntho li sa tsamae hantle te’ng, ha re sesa kahara mathata? Ke hobaneng, ha le nakong tse kang tseo, ho rata Molimo ho le bohlokoa ho feta ha ntho li tsamaea hantle?
- ④ Sheba potso e qetellong ea thuto ea Labone hape. E meng ea methati eo u ka e sebelisang ho hlaloesa motho eo eseng Molimo ka se boleloang ka ho rata Molimo? Ke joang rona, re le batho, re ka ratang Molimo eo re e-so ka re ’mona ka mahlo? Ke hobaneng e se taba hore na re kile ra ’mona kapa che, bonyane ka nama?